

两淮监法志稿

兩淮鹽法志稿卷一百三十九

職官門

名宦傳

下

鐵保字冶亭號梅庵滿洲正白旗人乾隆三十七年進士由編修官至兩江總督嘉慶十一年四月兩淮鹽法志告成鹽政額勒布恭疏進

呈奉

硃批書留覽著鐵保撰序鐵保謂鹽課居賦稅之半兩淮鹽課又居天下之半其有關於

國課民生者與農桑等奉是書而行者當仰承

聖天子斂福錫美之德意以足

國而阜民豈徒申均輸之令畫亭場之禁云爾哉鐵保工
詩與總督百齡學士法式善並稱三才子尤精書法北
人論書者以大學士劉墉內閣學士翁方綱配鐵保所
著曰梅庵集手輯八旗詩溯崇德至乾隆六十年得詩
數百家上之

詔賜名曰熙朝雅頌集

曾燠字庶蕃號賓谷江西南城人乾隆四十六年進士
選庶吉士改主事由員外郎超授兩淮鹽運使闢題襟
館於邗上公暇與賓從賦詩爲樂敦槃稱盛時垣商私

增鹽價爭收竈鹽場價踊貴煥整飭輪收之法價始平
嘉慶十年鹽政佶山續修兩淮鹽法志煥提調書局值
佶山去任煥繕黃冊由新任鹽政額勒布呈進屢遷至
貴州巡撫乞養歸道光二年授兩淮鹽政煥在揚州提
倡風雅一時才俊畢集與前運使德州盧見曾同有好
士之名聲華藉甚旋以五品京卿內召卒年七十有二
著賞雨茅屋集江西詩徵九十四卷

孫玉庭字寄圃山東濟甯州人乾隆四十年進士由編
修出爲監司嘉慶二十二年官兩江總督洊升大學士
任總督如故玉庭在兩江久嚴禁私梟因定例肩挑負

販零鹽在四十斤以下者免其禁捕遂有匪棍僞作小販或勾僱貧民分拆零售有礙正引疏請禁止凡遇淮北縣營稟獲私梟檄令附近道府訊結於是破案者眾梟匪益少又以江船夾帶屯船盜賣箕稱放碓場竈透私均爲鹽務之害檄奇兵營捕緝札行運司查明損工箕稱人數飭商實給工食不准需索船戶道光四年河決高家堰被議除名十四年重宴鹿鳴

諭賜四品服卒年八十有三

蔣攸銛字穎芳號礪堂漢軍鑲藍旗人進士由編修出任監司厯兩廣四川直隸總督道光八年以大學士任

兩江總督坐鹽梟事左遷侍郎卒於旅次攸銛性強記
與人一面數十年不忘僚吏驚以爲神尤喜汲引賢士
陶澍林則徐皆其所薦達也著有繩柅齋詩集

陶澍字子霖號雲汀湖南安化人嘉慶七年進士選庶
吉士由編修改御史初授川東道川督蔣攸銛奏其治
行第一擢山西按察使安徽布政使就遷巡撫調任江
蘇道光十年授兩江總督是時私梟黃玉林伏法前總
督大學士蔣攸銛及運使皆獲譴

宣宗命戶部尙書王鼎侍郎寶興赴兩淮與澍會籌鹽法上章
程十五則曰裁減浮費曰刪減窩價曰刪減繁文曰慎

重出納曰裁選商領曰酌核帶銷曰積欠宜緩曰實給
船價曰宜卹竈丁曰嚴究淹銷曰疏濬運道曰添置岸
店曰亟散輪規曰整飭紀綱曰淮北另籌

上嘉納之王鼎等遂請裁兩淮鹽政歸總督管理以一事權兩
江總督兼鹽政自此始淮鹽之弊也岸費窩價壩損歲
浮糜數百萬仰食者眾當事知其病而不敢發端澍謂
非減價不能敵私非輕本不能減價非裁冗費不能輕
本遂奏裁淮南窩價岸費場費二百五十餘萬金淮北
則創改道不改捆之議歸販不歸商之制每歲暢行倍
額溢課數十萬代償淮北之帶殘且劑淮南之懸引嘗

欲推廣其法於淮南雖以衰病不果而天下皆知票鹽之減價敵私爲正本上策不復爲綱法所縛持矣初淮南以十年行六綱淮北以十年行三綱虧帑本七百餘萬而以帑利貽患後來立預納減納貼息諸名色以數十年後之課豫虧之數十年前至道光八年十年間則已無可挪墊借貸澍任鹽政八載完正雜銀二千六百四十餘萬兩而在岸緩納之課尙不與焉又帶銷辛卯以前殘引百三十餘萬帶徵銃引殘課三百數十萬償前人之欠旋以鹺務起色疏請復設鹽政

溫諭不許卒年六十有二諡文毅建專祠於板浦場又入名宦

祠所著印心石屋文集五十六卷奏議七十六卷陶桓
公年譜四卷淵明集輯註十卷靖節年譜考異二卷蜀
輶日記四卷

林則徐字元撫一字少穆福建侯官人嘉慶十六年進
士由編修改御史初授浙江杭嘉湖道引疾歸道光二
年授淮海道擢江蘇按察使六年命署兩淮鹽政以未
終制辭不拜再任江甯布政使東河總督十二年調江
蘇巡撫十五年署兩江總督兼鹽政時陶澍每入

覲則徐輒權其任深悉淮鹺利弊十七年擢湖廣總督極力講

求堵私之法擇州縣之懈惰者劾之於是地方牧令始

知督銷爲分內之事

詔亦嘗以則徐曾署江督相勸勉楚督之保全淮綱不分畛域
莫則徐若也十八年移督兩廣因外夷事遣戍二十五
年

召還以四五品京堂用旋署陝甘總督遷雲貴總督引疾歸三
十年粵逆洪秀全倡亂

詔授則徐欽差大臣署廣西巡撫卒於途年六十有六諡文忠
陝西建專祠雲南請祀名宦祠

俞德淵字陶泉甘肅平樂人嘉慶二十二年進士由庶
吉士改江蘇荆溪知縣有聲林則徐賀長齡咸器之遷

徐州府同知道光八年陶澍奏擢常州知府調江甯當是時兩淮鹽法大壞澍在蘇撫任嘗極論之十年

宣宗召還總督蔣攸銑而以澍代時使臣王鼎寶興議罷官商鹽歸場竈科稅德淵具言鹽歸長竈其法有三一曰歸竈丁以按鋤起科其中難行者三一在竈丁逋欠一在鋤鑊私煎一在災祲藉口二曰歸官場以給單收稅然難行者亦三一在額數難定一在稽查難周一在官吏難恃三曰歸場商以認鋤納課然難行者亦三一在疲商鑽充一在殷戶規避一在垣外私售顧事難謀始如欲行之清竈僉商改官易制非三年不能就緒此三年

中課額未可常懸也場鹽未可停售也各岸食鹽未可
久缺也議上澍深然之乃罷前議澍舉德淵超授兩淮
鹽運使所改鹽法多資其力在任五年正課無缺揚州
俗尙奢靡德淵以儉樸矯之謹守筦籥權貴遊客多失
望德淵不顧也卒後荆溪長洲江甯士民皆請祀名宦
祠

陳鑾字芝楣湖北江夏人嘉慶二十五年一甲第三名
進士道光十九年陶澍卒

宣宗以淮鹺改章有效命鑾由江蘇巡撫署兩江總督篤守澍
成法北票暢行欲試之淮南未幾卒時論惜之

李星沅字子湘號石梧湖南湘陰人道光十二年進士
由編修歷府道除陝西四川江蘇按察使江西江蘇布
政使尋擢陝西巡撫調江蘇授雲貴總督二十八年移
兩江總督陶澍之改行北票也旣以新章取速效而淮
南課額重白銀貴錢賤銷數易虧星沅謂引滯課絀不
盡由私販而欲圖補救必以嚴治私販爲首務先後疏
奏無慮萬餘言皆得

俞旨褒勉未幾引疾歸三十年粵寇起

詔授欽差大臣咸豐元年卒於軍年五十有五諡文恭

謝元淮字默卿湖北松滋人起家丞尉擢無錫知縣爲

陶澍陳鑾所倚任澍創行海運漕糧及改淮北票鹽元
淮皆任其役初委淮北票鹽總局立青口團法其鹽歸
總局派賣除擡價預賣搶收等弊票法始大行十六年
權海州分司運判時票法中滯元淮停止陸運力持派
賣舊章十九年定驗資派引票復大暢陶陳繼亡遂被
排擠以改行票法時頗叢眾怨也旋擢南掣同知捐貲
重修儀徵育嬰堂救生局置田供其歲用二十二年再
權海州運判值海警行團坊場竈以安三十年鹽政陸
建瀛改行淮南票法詢之元淮新章效否元淮曰改法
必暢惟旣暢之後搖撼必多全在執事堅持定力耳建

瀛曰騎虎之勢斷無下理息壤在彼君無憂也咸豐元年元淮被讒罷旋授廣西桂平梧鬱鹽法道元淮始終南北改票之役著前後齟言四十四首專紀其事有養默山房詩稿三十八卷

陸建瀛字立夫湖北沔陽人進士由翰林院編修出任監司道光二十九年三月任兩江總督是年十一月湖北武昌塘角大火燒鹽船四百餘隻折商貲五百餘萬建瀛時在清江會籌漕河飛疏告災且言變法事先是御史劉良駒黎光曙條陳淮南推廣票鹽事下江楚督撫會議於是兩江總督牛鑒璧昌江西巡撫吳文鏞等

均以爲未便建瀛銳意改章檄調前臺灣道姚瑩議其事舊制商人請運徧厯運司十九房科及四首領衙門建瀛刪除繁文正雜課同時並納設總局於揚州裁除引目改用鹽照每張十引每引六百斤改小包爲中包每包六十斤每引十包行銷不分綱食只分四路湖廣爲一路江西爲一路安徽爲一路江蘇爲一路凡運湖廣鹽者准在湖北湖南所屬各府廳州縣但係淮南引地境內水陸隨商發賣江西皖蘇三路亦如之舊時楚省鹽價每斤約八十錢以六百斤成引牽算每引計錢四十八千新章減值一半以歲銷七十萬引而論每年

楚民食鹽可省制錢一千四百萬緡以江廣蘇皖合計
民間歲省鹽價錢二千七八百萬緡奏設九江湖口蕪
湖龍江四卡委員駐紮查驗楚西皖蘇商鹽夾帶鹽至
九江則任其所之楚西岸店全裁歲省陋規數百萬兩
自道光三十年四月開局收稅至十月奏銷已酉全綱
課銀四百餘萬兩掃數報解更有節省銀三十餘萬兩
聽候部撥向來奏銷專報正課銀二百餘萬其商人完
課分請呈加三次上納故多套搭至是蒂欠豁除截至
咸豐元年十二月計期一年有半共捆運楚西皖蘇鹽
一百三十六萬七千一百六引較之道光戊申綱僅運